

**LANG BESAR**  
Common Buzzard

FAMILI: Accipitridae  
NAMA SAINTIFIK: *Buteo buteo*

**CIRI-CIRI**

Bagi sub-spesies *B.b.japonicus*, terdapat dua morfisme yaitu morfisme pudar dan morfisme gelap. Individu dewasa morfisme pudar biasanya mempunyai jalur putih dan coklat gelap pada atas kepala dan leher, bahagian tepi kepala berwarna putih dengan jalur pada mata berwarna gelap, jalur-jalur coklat gelap pada tekak, jalur coklat yang jarang pada dada dan jalur coklat kekelabuan pada atas ekor dengan jalur-jalur gelap yang halus. Individu dewasa morfisme gelap pula mempunyai kepala, badan dan bulu pahat pada sayap yang berwarna coklat kehitaman seragam dan ekor dengan jalur terminal yang lebar. Individu juvenil morfisme pudar sama seperti dewasa tetapi mempunyai kurang jalur pada bahagian bawah badan, lebih halus dan jalur melintang pada ekor yang lebih seragam tanpa jalur subterminal yang lebar. Panjang keseluruhan bagi individu dewasa ialah 51-57 sm.

**MAKANAN**

Kebanyakannya adalah pemangsa dan ada juga yang memakan bangkai. Dietnya terdiri daripada mamalia, burung, reptilia, amfibia, ikan, ketam, moluska dan serangga.

**HABITAT**

Habitat yang sesuai bagi spesies ini ialah di kawasan hutan yang terbuka, pinggir hutan dan kawasan pertanian hingga ke ketinggian 3,660 m dari aras laut.

**BUNYI**

Spesies ini mengeluarkan bunyi *peeeooo* atau *peee-oo* yang ditekankan pada permulaan.

**STATUS**

Akta 76/72, dilindungi sepenuhnya.